

Basef Ifimba Pol Nanda'ef Fagafe'ma Galesiai

Basef bandafi Pol nanda'ef fagafe'ma esis Galesiai

- 1:1-5 Pol na'ipasa basef bu'wafi ma God nagatopalopas dowaf
1:6-2:21 Pol na'ipa esis Galesia basef bu'wafi Godi atifif, Kofagefa fa'i
apa' mogahapifa Kraiss atona
3:1-4:31 Apa' mahapifa Kraiss atona dei' God nofalapa epes be'epa
hilili'i. Mu'uli inimba fowa' nagaso' Mosesani owa'.
5:1-6:10 Kraiss nanda'apa mataga wahifipa ea' Ambal bu'unai Godi
natopalopapa manda' waf bu'wafi atef
6:11-18 Pol na'ipas solawais sogapoma anis epes si'i'ipasa sogatopa'
alop asasipi ea' na'ipasa basef akutaifi wapani
-

1 ¹Ae' Pol aposel Jisas Kraissii anda' basef ifimba. Ina anona aman
nandandepa ma enda' maol aposel, owa'atin. Ahamapa God nasa'ma
Jisas Kraiss nogosafel wandof sagaga'ii amom atom mandandepa ma epe
aposel igawalipasa basef Godi.^a ²Esis Kristen sahin owan hiasi sagape
na'ai salome, wanda'mepago dagala ipa' Kristen hipai pagape walemb
hiagoma itap lu'upa Galesiai.^b

³Ae' a'i ahamapa God noloma Jisas Kraiss Dembinai ape'inai mowa' banagaepa
motopalopepa dowafa opalef ipe'ilifi fegape awanelef.^c ⁴Jisas Kraiss nagi'ma okom
ahamapa Godi nalamona ambal ananinai nakwaha waf awafi apa' manda'afi.
Anen nanda'as na'amba natagwahepa ma waf awafi hiafi dei' fagape itap apa'ii.

⁵Ae' a'i amam nematawa hiasi sosa'ma agol Godi lu'wagol ma
mogogala'i ananiami atom lifilafi dondol. Endilisi.

Basef bu'wafi Godi atifif fape, anif daif owa'atin

⁶Ae' gogolawasowe ma ipa' pagakwaha waf bu'wafi God nogofalepa,
faloma Jisas Kraiss nagatopalopepa dowafafi. Dei' owa' pakwahef kwafalis

a 1:1 Ga 1:11-12 **b** 1:2 Ro 1:7; Fl 1:2 **c** 1:3 Ga 2:20; 1 Ti 2:6; Ta 2:14; 1 Jo 5:19

atis ea' paila anif basef daif dambaifi.^d 7Basef bu'wami Godi ea' amamba atom. Ina anif daif wapani, owa'atin. Dei' maina aga'ipipa basef ifimba? Ae' egawa anis epes daias salamona basef bu'wami Kraisi ma ukup ipe'ipi dei' pando pelaepa.^e 8Apa' i'i ae' a'a, anin epen a'a, anona ensel nifi'i heven ni'ipipa anif basef daif, owa' dondo' ma basef amamba afa' waga'ipipamia, epen inimbai pegame'an owa', hapaini. Ae' a'i atiasi God nowaloga epen inimba awani nili'amonan newala wambel awambili hel. 9Basef amamba wali' wa'ipipam ea', dei' a'ipipam wapani. I'i epen mamahina ni'ipipa anif basef daifa owa' fefe' dondo' si'i basef amamba bu'wami Godi pagagi'mamia, ae' a'i epen inimbai God nowalagon nefe' wambel awambili hel.^f

¹⁰Ipa' ukup pandame' pa'imama ma basef ifimba? Pa'i ae' a'ifa anis sinifelowe sogasa'ma agol ae'agili? Owa'atin. Ae' a'i God atotona opaf bo'ofa ae'. Ipa' pa'ias pa'i a'ifa anis epes soganifelowe? Owa'. I'i enda' maola igambimifai anis epesa opalef bo'walefa ae'ma, ae' ina aman anda' maola Kraisi, owa'atin. Ae' agambaso'ami. Apa' owa', owa'atin. Anda' maola Kraisi atonai endilisi.^g

Fowa' God nofala Pola nanda' maol aposel nagawalapa basef Godi

¹¹Sahin owan alipipai ae'ipai, ae' a'i ipa' pegawa basef ifimba ae'afi. Basef bu'wami Godi agawalipasami, amamba ina mataga okom anin epeni, owa'atin.^h

¹²Ae' ina efa'ama anin epen, owa'. Ina anin epen nawalipi basef amamba kofagema, owa'atin. Jisas Kraisi atona nawalipi basef amamba bu'wami.ⁱ

¹³Waf fowa' anda'afi, esis sa'ipipaf pegawaf ea'. Fowa' anda' lotu ma God aila waf esis Juda sanda'afi. Ae' agahambombaga esis Kristen epes Godi banagambili. Ae' ina atilis uwahipis, owa'atin. Anda' maol dindinipa ilamonas hi'igalas.^j

¹⁴Ae' ikila' epes hiasi Juda agalomas aol atol wogataga atifi, ikila'asa agaila waf esis Juda sanda' lotuma Godafi. Anis sailaf kwasakwasala apa' ae' ailaf dindinip hi'alaf. Ea' banagewe a'owa' ma agaila waf fowa'ifi amom akupapa manda'afi. Ae' ailaf andeande' a'owa' ikila'as.^k

¹⁵⁻¹⁶Apa' fowa' gani ma'me ata' owa' kolaea, God natopalope dowaf nosahe'e nofale ma enda'mana maol. Ama main, nemaf afamba anen na'i nihimba'me Nogamana ananinai ma igawalipasa basef bu'wami ananiami isimba sogololama Godi, nemaf afamba ae' ina afe' ahali' anin epena maol inimba, owa'atin. ¹⁷Ae' ina afe' wambel Jerusalem ati amom God nali' nandandepama manda' maol aposeli, owa'atin. Nemaf afamba atef afe' itap lu'upa Arebia. Ama main, itanima afe' Damaskus.^l

d 1:6 Ap 15:1,24 **e** 1:7 1 Ko 16:22 **f** 1:9 1 Te 2:4 **g** 1:10 Mt 16:17 **h** 1:11 Ga 1:1
i 1:12 Ap 8:3 **j** 1:13 Ap 22:3 **k** 1:14 Ais 49:1; Jer 1:5; Ro 1:1; Ap 9:3-6; Ga 2:7 **l** 1:17 Jo 1:42, Ap 9:26

¹⁸ Afagof wanogof fafe'ma ea', afe' Jerusalem ati Pita ape alomana wikifah biagah.^m ¹⁹ Apa' ae' ina ati anom aposel daiam, owa'. Ati Jems atotona, Dembinai Jisas owamana.

²⁰ Ae' a'ipipa endilisi ma naep Godi nogawa basef ifimba anda'afi, ifimba endilisifi atif. Ae' ina ambaso'mepa, owa'atin.ⁿ ²¹ A'i owa' main, afe' analemb walemb bagape itap biafip lu'upa Siria Silisia. ²² Nema afamba esis Kristen sagape itap lu'upa Judiai ina sogawa ae' andeande', ata' owa'. ²³ Esis same' basef atifa anis daias saga'i, "Aman anamba fowa' nagahambombagapa maloma basef Kraisi, nandaiwa'ma hapif ape'ini apa' dei' owa'atin. Anamba nawalapa basef amamba atom fowa' nagahambombagami."

²⁴ Ea' God natopalope ahapifana. Isimba atis dei' sasa'ma agol Godi lu'wagol.

Amom aposel daiam opalef atelef maloma Pol

2 ¹ Ama afagof hiagufi 14-pelaiguf fafe'ma ea', ae' afe' Jerusalem wapani. Aloma Barnabas wafe' atin. Ae' ao'wa Taitus wapani nafe' nalomafa.^o ² God nihimba'me na'amba ea' afe'. Basef ifimba bu'wafi agawalapefa esis anep mini'ap owa' Judaisia ihimba'masef esis Kristen sagape Jerusalemi wapani. Ea' aloma amom agufumi atom mape, ihimba'mamef. Ae' andaiwa'ma maol fowa' anda'ani neloma dei' anda'ani netaga falafin negenalo dowaf, owa'atin.^p ³ Taitus, anen alipunai ae'anai, amom mogawa anen aman Grikinai. Apa' amom ina matopa'mana alop si'i amom Juda manda'am, owa'. Ma'i aho'mana.^q ⁴ Basef ifimba Taitus nogatopa' alop a'a owa' fagataga na'amba. Fowa' amam magambaso'ami ma'i amom Kristen sahin owan endilisimi a' motopa' alop amamipi. Ea' mandambaho' mawisi nomona apa' Kristen ma'i monandona waf usi'ifi Jisas Krai naso'apaf apa' magape sisihipa ma anini. Ea' dei' natagwahepa ma waf awafi mape wahifipa. Amom ma'i mogawa waf afamba magape wahifipa ea' ma'i mili'amapa mogape lafela basef amamifi fowa'ifi. ⁵ Apa' ina ma'i aho'ma mogaila basef amamifi kwasakwasala, owa'atin. Dei' main, apa' ma'i mumafi basef bu'wami endilisimi mondape usi'ima ipa' pigahapifam andeande'.^r

⁶ Amom agufumi esis Kristen saga'i agufumi asasimi, ae' andaiwa'ma egasa'ma agofa anis epes, owa'. A'i agof mamahagofa falafugufi atogof. God ina nati alop ando' nowalogas, owa'atin. Anen nati ukupi nomonas nomon nawalogas. Amom ina ma'ipi anif basef daif wapani ma igawalipasef, owa'atin.^s ⁷ Apa' amom mogawa God nase'e maol inimba ma igawalipasa basef bu'wami owa' Judaisia, si'i nagaso'anan

m 1:18 Mt 13:55 **n** 1:20 Ap 9:30 **o** 2:1 Ap 15:2 **p** 2:2 Ap 16:3 **q** 2:3 Ga 1:7; Ga 5:1,13 **r** 2:5 Ap 10:34 **s** 2:6 Ap 22:21

Pita nagawalipa esis Juda. ⁸ God nandandepa Pita nowa' banagona ma nonda' maol aposel nogawalapa basef ananifi ma esis Juda. Ea' na'amba atina God nandandepa nowa' banagae ma enda' maol aposel igawalipasa basef ananifi isimba owa' Judaisia.^t ⁹ Esis Kristen sa'i agufumi asasimi Jemsi Jon, maloma Pita. Amom mogawa God natopalope dowaf nase'e maol inimba. Ea' manda'afa alipufai onda' maol atitin Godi. Ea' amom wanom ma'i maso'afa lagof ae'i Barnabas mihimba'ma esis, afa' waloma amom wape opalef atelef wanda' maol atin Godi. Ea' amom wanom ma'i aho'ma ondawalagatani ma afa' biafa ogafe' ma esis owa' Judaisia, amom mefe'ma esis Juda.^u ¹⁰ Amom ma'ipafa basef ifimba atifif ma'i afa' biafa ope otopalopa esis Kristen sagape Jerusalami kwahusi, otamba mais akasi. Maol inimba ae' okom ma'ian a'owa'.

Pol na'ipa Pita ma waf awafi ma nogohnaep hiasii

¹¹ Nema' afamba Pita nafi'i wambel Antiok, ae' esambala basef ananifi ma nogohnaep esis Kristen hiasii. Dei' main, anen nanda' waf awafi.^v ¹² Nali' nafi'i nape naloma esis Kristen owa' Judaisi na' gwa'aisi nalomas. A'i owa' main, nati amam amamba Jems nasapa'am magafi'ii, Pita ombal bahana ma amom Juda dindinapima mugaila waf afamba magatopa' alopafi. Ea' nandahagas nakwaha esis Kristen owa' Judaisia, ina ata' na' gwa'aisi nalomas wapani, a' owa'atin. ¹³ Anis Kristen Juda wapani ombal mahas sakwaha esis owa' Judaisia sagi'ma Pita. Barnabas wapani ombal mahana nanda'as na'amba atin si'i esis.

¹⁴ Nogota atamba ae' ati waf epes isimbai, ina saila ufiaw waf usi'ifi dondo'ma basef bu'wafi Godi endilisifi, owa'atin. Ea' a'ipana nogohnaep esis hiasii a'i, "Ina' Judainai. Apa' owa' dei' ina' naila waf anep mini'ap sogololama Godi. Waf apa' Judai, a' nakwahef ea'. Dei' maina ina' banagena a'owa' ma nelaepa esis mini'ap apamba sogaila waf apa' Judai? Na'ambai ina andeande', owa'. Awasim.

Epen ami nagahapifa Jisasi nataga bo'wen hilili' ma naep Godi

¹⁵ "Apa' mataga mamasapa ape'isi Juda, apa' ina mataga epes isimba owa' Judaia sanda' waf awafii, owa'atin.^w ¹⁶ Apa' mogawa God ina okom mapoma epen inimba nagahapifa mu'uli ananini ea' nanda' epen inimba bo'wen hilili', owa'atin. Epen nagahapifa Jisas Kraisi atin, dao' God nofalan na'i bo'wen hilili'i. Ea' apa' wapani magahapifa Jisas Kraisi ea'i, God na'i apa' epes bu'upai hilili'i ma magahapifa Kraisi. Apa' mu'uli owa'atin. Dei' main, ina anin epen naila mu'uli inimba God nagaso' Mosesani, dei' God nofalan na'i anin bo'wen hilili'i, owa'atin. ¹⁷ Apa'

^t 2:8 Jo 1:42 ^u 2:9 Ap 11:29-30 ^v 2:11 Ap 11:3 ^w 2:15 Ap 15:10-11; Ro 3:20-28; Ro 4:5, 11:6; Ga 3:11

mape sisihipama Kraisi dei' God nofalapa epes be'epa hilili'i. I'i basef ifimba endilisiai, dei' mape ma'imama? Epes sigati apa' owa' mila mu'uli inimba fowa' God nagaso' Mosesania, atiasi sofalapa si'i apa' epes aupai si'i isimba owa' Judaisia. I'i esis si'ipapa na'amba, apa' ina a' mi'i Kraisi nasa'ma apa' manda' waf afamba awafi, owa'atin. ¹⁸I'i ae' egalata anota ipata itanimai esa'mata wapani, dao' isimba sawalapa ae' aman agatopa' mu'uli inimbai.^x

¹⁹“Dei' main, mu'uli inimba nahe aga' ea'. Ina la'ifina negala'ata ae' wapani, owa'. Dei' nahe aga' ma etaga egape namowe efa' ambal namili igaila okom Godi. Ae' ea' ape sisihiwima Kraisi aga' ail alomana lawag usi'igai ti'wanaegai.^y ²⁰Ae' ina ape namowe ma ambal ae'ali atol, owa'. Kraisi atona nape namona opaf ae'afi. Dei' agape itap apa'e, ape aila banagami Nogamana Godi ahapifa anen atona. Anen okom maimaili a'owa', nalamona ambal ananinai ma nagatopalope dowaf. ²¹Ae' ina ewa' alafugama waf God nagatopalope dowafafi, owa'atin. I'i mu'uli fowa' God nagaso' Mosesani nenda' epes sotaga bo'wes hilili' ma naep Godiai, dei' waf Kraisi nagaga'mafi falafifi atef kofagefa akaf.”

Waf biafif, sagaila mu'uli fowa' God nagaso' Mosesi faloma sagahapifa Kraisi

3 ¹Ipa' Galesia ukup pagahipai. Afa' wawalipipa basef alihifa Jisasi Kraisi nagaga'ma ipa' lawag usi'igai ti'wanaegai, wawalipipaef alihif endilisi si'i pagatolom naep ipe'ipi. Dei' ata' ami nalamona ukup ipe'ipi pase'epa? Na'ambai owa'. ²Ae' a'i ihali'ipa ma basef atifif. Fowa' ipa' pefa' Ambal bu'unai Godi nape opalef ipe'ilifi. Ipa' paila waf si'i mu'uli God nagaso' Mosesani naga'ias pefa'ana a'a pame' basef bu'wami Godi atom pahapifam pefa'ana? ³Endilisi, ae' ati ipa' ukup pagahipai. Ipa' pasefela maol panda'an banagena Ambal bu'unai Godi, apa' dei' owa' pa'i penda'an pimbifana pepel ipe'ini atin. Na'ambai awasim. ⁴Dei' hiahaom amamba akafimi fowa' ipa' pegefa'ama maol bu'wani Godi pefa'am dowaf? Owa'. Ae' a'i amamba ina matagamepa dowaf, owa'atin. ⁵Dei' God nase'epa Ambal bu'unai ananinai nanda' maol banagani la'afena ipa' ma main? Anen okom mandanda'ma ipa' paila mu'uli fowa' nagaso' Mosesani a'a pame' basef bu'wami ananinai pahapilam pailam?^z

⁶Ipa' ata' ukup pendanda'ma Abraham. Anen si'i ikwafa waf usi'ifi pagahapifa Godafi. Basef Baibelifi fa'ias alihif fa'i, “Abraham nahapifa God. Isimba atis dei' God na'i anen aman bu'unai hilili'i.”

⁷Ea' dei' ipa' pendegawa, epes isimba mamahisa sogahapifa Godi ma basef bu'wafi ananifi, epes isimba ea' bafasana awasi endilisi Abrahami.^a

⁸Fowa' basef Baibelifi fa'ias alihifa nogota owagama God nonda' esis owa' Judaisia sogahapifa anen, sogataga bo'wes hilili' ma naep ananipi.

^x 2:18 Ro 7:6 ^y 2:19 Jo 13:1; Ga 1:4 ^z 3:5 Ro 4:3 ^a 3:7 Ap 3:5; Ro 4:16

Fowa' basef Baibelifi fa'ipa Abrahamama basef bu'wami Godi. Fihimba'mana fa'i, "Anaf owagama God nonda' ina' ma negatopalopa epes hiasi sagape itapi sogape bo'wes."

⁹Abraham nahapifa God ea' God nafalo'mana na'ipana basef bu'wami ananiami. Dei' God a' nofalo'ma epes mamahisa sogahapifa anini ni'ipasa basef bu'wami ananiami na'amba atin si'i fowa' nagatopalopa Abraham.^b

¹⁰Epes mamahisa hiasi ukup pagapoma waf sagaila mu'uli esis Juda sagailani dei' sape lafela okom aunai Godi. Dei' main, basef fagail Baibeli faga'i na'amba fa'i, "Epen ami dondol owa' nigaila basef hiafi fagail mu'uli Godi hi'ilifa, isimba sape lafela okom aunai Godi."^c

¹¹Dei' basef ifimba fataga fandawalap alihif. Ina anin epen atitin naila mu'uli Godi nataga be'ena naep Godi, owa'atin. Dei' main, basef fagail Baibeli faga'ias na'amba fa'i, "Epen mamahina nigahapifa Godi atin netaga bo'wen hilili' ma naep ananipi ma negape andeande' lifilafi."^d

¹²Apa' waf kofagefa sagaila mu'uli inimba Godii ina fape atogon kwasakwasala si'i waf sagahapifa Godafi, owa'atin endilisi. Basef fagail buk Baibeli fa'i anif basef banagafi ma mu'uli inimba fa'i, "Epen ami nagaila basef hiafi fagail mu'uli inimbai hi'agalafi, epen inimba nape namina nagaila basef ifimba hiafi hi'agalef."^e

¹³Apa' owa' Krai natagwahepa ma okom wandafunai Godi nagape mu'uli ananinii. God nanda' nimaniami ma awami ape'imi hiami hi'alam nakolasom mafe'ma anen atona, ea' kofagema amamba mapoma anen atona nofa'am. Dei' main, basef fagail Baibeli fa'i, "Epes mamahisa sandolas sahas sagail lawah usi'igahi ti'wanaegahi, isimba atis sape lafela okom aunai Godi."

¹⁴Krais Jisas nanda'as na'amba ma nonda' hiahawes fasifi God naga'ipanas Abrahami sogatagama anis epes daias sogolalama Godi. Nanda'as na'amba ma apa' mogohapifa basef bu'wami ma mogofa' Ambal bu'unai Ananinai si'i fowa' nala' lap naga'ias.

**Mu'uli esis Juda sagailani ina la'ifina negelefata
basef banagafi God nala' lap naga'iefi, owa'**

¹⁵Ipa' Kristen sahin owan, a'i i'ipipa anif basef waminif atina waf ape'ifi. I'i anom amam manda' lapa anif banagafi, ina atiasi anin epen la'ifina nehape'ef a'a negewatanif, owa'atin endilisi. Fepe banagef atapif.^f

¹⁶Fowa' Godi Abraham mala' lap papoma bafamana ananinai anaf nogataga, si'i waf apa' epes magala' lapafi. Basef fagail Baibeli ina fa'i, "Ina' neloma bafasena ine'isi." Owa'atin. Ifimba fa'i epes hiasi. Apa' basef fagail Baibeli fa'i, "Neloma anona bafamena ine'inai." Ifimba fa'i epen

b 3:9 Diu 27:26 **c** 3:10 Ro 1:17; Ga 2:16 **d** 3:11 Ro 10:5 **e** 3:12 Ro 8:3; 2 Ko 5:21; Ga 4:5; Diu 21:23 **f** 3:15 Ap 7:5

atotona anen Krai.s.¹⁷ Basef ae' aga'lipipafi kofagefa na'amba. Fowa' gani God na'i basef nala' lap na'i endilisi owagama fela gwa'aisi. Ea' afagof hiagufi 430-pelaiguf fafe' fafe'ma ea', God naso'as mu'uli ananini nagaso' Mosesani. Mu'uli inimba ina la'ifina negahape' basef ifimba fagali'i God nala' lap nanda'afi, owa'atin endilisi.^h ¹⁸Dei' main, God nanda' waf bu'wafima apa' nofa'apa makwaha waf awafi mutanimai. I'i mu'uli inimba newalapai waf afamba bu'wafiai, dei' basef God nagala' lapafi owa'. Apa' owa', owa'atin. Fowa' God nala' lapa waf afamba bu'wafi natopalopa Abraham dowaf nofa'ana notanimai.ⁱ

¹⁹Dei' God naso'apa mu'uli inimba ma main? Fowa' gani God nali' naso'apa lap apamba ananipi. Nagi' nowatani mu'uli inimba nigihimba'mapa kofagema ma waf awafi fagataga alihif. Ea' God na'i mu'uli inimba nepe nifi'i netambel nogota atamba Abraham bafamana nogataga atai. Fowa' God na'i basef ifimba nala' lapa bafamana anamba. God na'ipam mu'uli inimba amom ensel ea' ma'ipa epesa aman nagape la'afeni, anen Moses. ²⁰I'i epen atitin nepe, aman nagape la'afeni owa' maol akana. Apa' i'i epes hiasi sogape, dao' anen nope la'afena esis. Apa' God ina anona aman nape la'afen natopalopana, owa'. Ea' anen atona nandape/^j

Mu'uli fowa' God nagaso' Mosesani nali'apa ma mogafe' ma Krai

²¹Ipa' pa'i basef ifimba fagail mu'uli esis Juda sagailani fa'i fepa'aga basef God nala' lap naga'iefi a'a owa'? Owa'atin endilisi. Dei' main, apa' hiapai magape itapi manda' waf awafii. I'i God noso'apa anin mu'uli ma mogofa' ambal namiliai, dao' a' motaga epes bu'upai hilili'i ma mugaila mu'uli inimba. Owa', owa'atin.^k ²²Apa' basef fagail Baibeli fa'ias na'amba fa'i, “Epes hiasi sagape itapi sape lafela banagami ma waf awafi hi'alas.”

God nanda'as na'amba ma epes mamahisa sagahapifa Jisas Kraisi fowa' nala' lap na'i basef pagapomasi.^l

²³Fowa' gani waf afamba sagahapifa Jisas Kraisafi ina dei' fataga, ata' owa'. Nemaf afamba mu'uli esis Juda sagailani nala'atapa sisihpa mape si'i kalabus mape mape ma dei' nemaf afamba God nihimba'mapas alihisa apa' magahapifa Jisas Krai.s.^m ²⁴Mu'uli inimba si'i anin epen nigimafiapa nefa'apa magafe'ma Kraisa mogohapifana ma God nogofalapa epes be'epa hilili'i. ²⁵Dei' nemaf afamba afataga ea' ma mogohapifa Krai.s. Ea' mu'uli inimba ina ata' nimafiapa wapani, a' owa'atin.ⁿ

Apa' mahapifa Krai.s, isimba atis dei' mataga awasi Godi

²⁶Ipa' pahapifa Krai.s Jisas. Isimba atis dei' ipa' hipai pataga awasi Godi, pape sisihpama Krai.s Jisas.^o ²⁷Ipa' hipai panda' baptais hi'alepa ma pagape

g 3:16 Eks 12:40 h 3:17 Ro 4:14, 11:6 i 3:18 Ro 5:20; Ap 7:38 j 3:20 Ro 8:2-4
 k 3:21 Ro 3:9-19; Ro 11:32 l 3:22 Ga 4:3 m 3:23 Ro 10:4 n 3:25 Jo 1:12 o 3:26 Ro 6:3, 13:14

sisihipama Kraisi. Ea' dei' pefa' waf ananifi si'i pegowaho' lowagwif.^p 28 Dei' ina anis epes sape dambesi ma anis daiasa naep Godi, owa'atin. Esis Juda ina sape dambesa isimba owa' Judaisia, epes mamahisa agof akasi ina sape lafela epes agufisi, amam ina mape dambema awo nematawa, owa'atin. Ipa' hipai pape sisihipama Kraisi hi'alepa pataga atifipa.^q 29 I'i ipa' Kraisi si'ipa, andeande' ipa' awasi Abrahami pagahapifa Kraisi ma anaf God nofa'epa pitanimai pegape andeande' si'i basef ifimba fowa nala' lap nagaloma Abrahamafi.

**Apa' fowa' magape lafela waf awafii dei' Kraisi
atona nanda'apa mataga awasi Godi**

4 ¹Basef ae'afi fagape na'amba. Awani nogamana nagali'i anamba owagama nogofa' hiahawes ahamanai. Apa' anen ata' sa'ona sanda'ana nape lafela anona aman dembinai. Apa' endilisi hiahawes hiasi ahamanai, a' ananisi si'is. ²Nemaf afamba nogamana ata' sa'ona, nape lafela agufumi mumafianama gwa'aisi otamba mais nafe' nafe'ma nemaf ahamana nandandepafi fagataga. Afamba amom ina ata' mumafiana wapani, a' owa'atin.^r ³Apa' wapani mape na'amba atin si'i nogamana anamba. Fowa' apa' ata' owa' mohapifa basef Godi andeande'a, nogota atamba ata' manda' maol mape lafela ambagof awami dembami mugumafi hiahaom hiami magape ilif itapi.^s ⁴Owa' nogota atamba God naga'iatai tataga, anen nasapa' Nogamana ananinai nafli' itap apa'e. Ano'w nemata'w kolana nataga epen nape lafela mu'uli esis Juda sagailani.^t ⁵Ama nogatagwahepa ma mu'uli inimba negewa'apa ea' natalepa ma mogape wahifipa. Nanda'am na'amba ma God dei' notowandefapa mogape si'i awasi ananipai endilisi si'ipa.^u

⁶Apa' mape awasi ananipai. Isimba atis dei' God naso'apa Ambal bu'unai Nogamanai nawis ukup ape'ipi. Ambal anamba nalef nofalana na'i, "Ahame, Ahame!"^v ⁷Dei' ipa' ina pape panda' maol lafela ambagof amamba awami, owa'atin endilisi. Ipa' batawis ananipai. Anaf God nogase'epa hiahawes fasisi hiasi nandondombas sapoma nogaso'apas apa' awasi ananipai wapani.^w

Pol okom maimaila esis Kristen sagape Galesiai a'owa'

⁸Fowa' ipa' owa' ata' pegawa Goda, pape panda' maol aunai pape sisihipa lafela ambagof awami. Amom ina endilisimi, owa'atin. ⁹Dei' ipa' pegawa God. Apa' endilisi, anen nogawa ipa'. Apa' dei' ami ata' nanda'epa pitanima pandahagas pafe' pagaila ambagof amamba awami? Amamba ina banagami, owa'. Dei' maina ipa' pa'i pegape lafelam wapani? Hapaimi.^x ¹⁰⁻¹¹Ae' okom mapoma ipa', ombal mahe. Dei' maina ukup ipe'ipi pandanda' be'ebe'ep pagapoma afagol dambaigili galoma

P 3:27 Ro 10:12; 1 Ko 12:13 **Q** 3:28 Ro 4:13 **r** 4:2 Ga 3:23; Kl 2:20 **S** 4:3 Ef 1:10; Jo 1:14; Ro 1:3 **t** 4:4 Ga 3:13 **u** 4:5 Ro 8:15-16 **v** 4:6 Ro 8:17; Ga 3:29 **w** 4:7 1 Ko 8:4-6
x 4:9 Ro 14:5; Kl 2:16

awin dambaini saloma nogota asaf owaf sogatagatai saloma anif nimaguf paga'i lu'wafi panda' lotuma Godafi ma pagasafam? Na'ambai hapaimi. Na'amba maol ae' anda'ana agatopalopipani nenalo dowaf. ¹²Dei' a'ipipa dindinip a'i ipa' pekwaha nomonas isimba pagape lafela mu'uli inimba. Ae' ina ape lafela mu'uli Godi, owa'. Ape wahifiwi. Ea' pepe wahifipa si'i ae'. Dei' main, ae' ahapifa Kraisi si'i ipa'. Fowa' ipa' ina panda'me anef waf awafi, owa'atin.^y ¹³Ipa' pegawa fowa' dambadamba agafe'mago ipa', alop ae'api ina banagep, owa'. Ape alomepa anif nimaguf, awalapa basef bu'wami Godi a'ipipa. ¹⁴Aowas lu'wani nanda'e ea' alop ae'api aop. Isimba sanda'epa nimanipa. Apa' ipa' ina patolowe pandafafa'me pewa' alafugahe, owa'atin. Ipa' pandagalame si'i pandagalama anona ensel Godi, a'a si'i Kraisi Jisas atona. ¹⁵Fowa' ape agalomepa ipa' pandagala a'owa'. Apa' dei' dagala ipe'ini ahi'alan. Ae' atowe a'i endilisi i'i ipa' la'ifipa ai, pigi naep ipe'ipi pese'ep.^z ¹⁶Apa' dei' mama? Ae' si'i bouwai ma aga'ipipa basef ifimba endilisifi a'a owa'? Ae' ina egawa, owa'.

¹⁷Endilisi, anis epes daias sagambaso'ami ukup pehafel dindinip sa'i sombemefa ukup ipe'ipi ma pigaila basef asasifi. Apa' ukup asasipi ina be'ep, owa'. Esi ina satopalopepa ma basef Godi, owa'atin. Sandaiwa'ma ipa' pegame' basef ae'afi. Sanda'am na'amba ma ipa' ukup pehafel dindinipa pigaila esis atis. ¹⁸I'i esis ukup pehafel dindinipa waf bu'wafi ma sogatopalopepa lililafi, dao' na'ambai a' andeande'. Apa' i'i sonda'as na'amba nimaguf ifimba atif ae' ape agalomepa, ina andeande', owa'. Apa' sonda'as nimaguf ifimba ikwahipa igafe'ai, dao' andeande'. ¹⁹Ipa' awasi alipipai ae'ipai, ae' ame' akafimi amamba atom si'i nematawa wame' akafimi ogola awasi. Ame' akafimi amamba ma ipa' efe' efe' etaga ma nogota atamba Kraisi notaga nondawalap opalef ipe'ilifi nomon. ²⁰Ae' ati uwahipipa! Dei' okom malamafe'ma ipa' a'owa'. Ae' ina egawa etopalopepa i'imama? Ea' okom maimailipa a'i dei' epe elomepa i'ipipa anif basef bu'wafi nogohnaep ipe'isi. Apa' owa'atin.

Pol na'i anif basef waminif atina nematawa biawa Hegai Sera

²¹Ipa' pa'i pepe lafela mu'uli inimba God nagaso' Mosesani. Dei' a'i ihali'ipa ma anif basef. Ipa' pegawa basef kofagefa ma mu'uli inimba a'a owa? Dei' a'ipipa^a ²²si'i basef fagail Baibeli faga'i, atiasi Abraham nola awasi amam biam. Anona, kwanda' maola anen dowafi Hega kogolanai. Apa' anona, waulu'mana endilisi Sera kogolanai.^b ²³Nogamana kwanda' maol dowafi nemata'w akwamba Hega kogolanai si'i apa' epes sandaso'ama sogola awasi. Apa' nogamana Sera kogolanai natagama basef lap God naga'iefi.^c

^y 4:12 1 Ko 2:3 ^z 4:15 Emo 5:10 ^a 4:21 Jen 16:15, 21:2 ^b 4:22 Ro 9:7-9 ^c 4:23 Ro 8:15; Ga 5:1

²⁴Nematawa awamba biawa ondola'waifa basef lu'wafi ma lap biafip. Nemata'w akwamba Hega kondola'waifa basef fagataga halafuta Sainai. Awasi ako'usi anaf agof akas sonda' maol dowaf sope lafela anis daias.

²⁵Ako'w kondola'waifa halafuta Sainai, tagape anep itap lu'upa Arebiai, ea' ako'w basef waminif atina wambel ambalemba Jerusalem dei' nagape itap apa'i. Dei' main, ako'w kwape kwanda' maol banagambel kwaloma awasi akwa'usi sape lafela banagami si'i esis Juda sagape Jerusalem sagape lafela mu'uli God nagaso' Mosesani.^d

²⁶Apa' wambel mamambel ape'imbili Jerusalem nagape heveni. Epes mamahisa sagape wambel ambalembai ina sape lafela mu'uli inimba, owa'atin. Sandatagwah sape wahifis.^e

²⁷Dei' main, Baibel naga'ias na'amba na'i,

“Nemata'w, ina' nembel bagasi'inai ma owa' negela awasia, ina' awi dei' nindanifal ni'i mehup. Ina' ata' owa' negame' akafimi si'i sola awasi sgame'amia, ina' awi nekwalefa malogol nega ni'i mehup! Nemata'w asa'wi, atiasi kola batawis hiasi kwikila' nemata'w kwagaso' amani kogolasi.”^f

²⁸Dei' ipa' sahin owan ae'ipai, ipa' awasi Godi pataga si'i basefa lap God naga'iefi na'amba atin si'i Aisak. ²⁹Fowa' nogota atamba awani aman nagataga waf afamba amam nematawa sandaso'amafi naso'ana nimanimi awani aman inimba God atona nanda'an nagataga banagami Ambal bu'unai ananinai. Isimba ea' na'amba atin dei' wapani. Esis sagape lafela mu'uli fowa' God nagaso' Mosesani saso'apa akafimi apa' awasi Godi.^g

³⁰Apa' dei' buk Baibel na'ias na'imama? Na'ias na'i,

“Li'amonago nemata'w akwamba agol aka'wi kwanda' maol dowaf kwagape lafela anis daiasi kolomago nogama'w akwa'unai. Awani inimba atiasi ina nefa' hiahawes ahamanai noloma awani nagataga nemata'w kwagape wahifi'wi, owa'atin.”^h

³¹Ea' dei' apa' Kristen alipipai, ina si'i awasi magataga nemata'w akwamba kwagape lafela anis daiasi, owa'atin. Apa' si'i awasi magataga nemata'w akwamba wahifi'wii.

Apa' wahifipai, a' mondape wahifipa endilisi

5 ¹Krais atona natagwahepa magape epes wahifipai. Isimba atis dei' ipa' dalutu banagepa. Ina ata' pi'i awi ma anis epes sehekelepa pepe lafela mu'uli esis Juda sagailani wapani, owa'i.ⁱ

²Peme', ae' Pol a'lipipa isimba. I'i ipa' piga'i awi ma amom mogatopa'mepa alopa, Krais ina atiasi notopalopepa kwasakwasala, owa'atin endilisi. ³A'i i'ipa ipa' amam hipai wapani. Aman ami ni'i

d 4:25 Hi 12:22; Re 3:12; Re 21:2,10 **e** 4:26 Ais 54:1 **f** 4:27 Ro 9:7; Ga 3:29

g 4:29 Jen 21:10; Jo 8:35 **h** 4:30 Ga 3:29 **i** 5:1 Jo 8:32,36; Ga 2:4, 5:13; Ap 15:10

awi ma mogatopa'mana alop ananipi, anen nila mu'uli inimba hiani hi'indalan. ⁴I'i ipa' pa'i pila mu'uli inimba ma atiasi God niga'i ipa' epes be'epa hilili'ima, ipa' pandahape' pakwaha Kraisa pefalana bounai, ea' pelelama waf God nagatopalopapa dowafafi pakwahef. ⁵Apa' owa' atin. Apa' mahapifa Kraisa banagami Ambal bu'unai Godi. Ea' mogawa endilisi mope mohafa anaf God niga'i apa' be'epa hilili'i ma okom ananimi.⁷ ⁶Epen ami nepe sisihina Kraisa Jisas, waf afamba magatopa' alopafi o owa' mogatopa' alopia afamba falafifi atef owa' banagefa. Apa' waf sagahapifa Kraisa atef fawalapai waf ukup pagapagailasafi. Isimbai atis fasisi endilisi sikila'.^k ⁷Fowa' ipa' pape panda' waf fasifi pailaf andeande'. Apa' dei' ata' ami nasopama ufia'wa ipa' ma owa' pigaila basef endilisifi wapania? Ami nahondo' ukup ipe'ipi pakwaha basef ifimba? ⁸God ina nanda'epa na'amba, owa'atin. Anen nofalepa pafi'mai anen.^l ⁹Anom gawaimi maga'i na'amba ma'i, "Anis yis sanda'asa bret tagatefi, isimba atiasi sonda' bret tetef hi'ilata."^m

¹⁰Ae' alomepa ukup atifip mape sisihipama Dembinai. Ea' egawepa ipa' atiasi ina pila anis nomonas daias, owa'. Pigaila okom ae'ami atumi. Ae' ina egawa aman anamba nagalamona ukup ipe'ipi, owa'. Ea' diamanago, anen nanda' waf awafii atiasi nofa' akafimi ma God.ⁿ ¹¹Ipa' sahin owan ae'ipai, i'i endilisi ae' awalipipa ma basef ifimba pagatopa' alopafiai, dei' maina esis sa'i sogase'e akef? I'i ae' i'ipipa basef ifimbaiai, esis ina si'i sehe', owa'atin. Apa' ae' a'lipipa basef bu'wami ma Kraisa nagaga' lowag usi'igai ti'wanaegai. Ea' esis ukup awep sa'i sese'e akafimi. ¹²Amom amamba magalalamona ukup ipe'ipii, ea' andeande'ma mogatopa'mama alop apamba du'wanip amamipi atop hi'igalap!^o ¹³Endilisi ipa' sahin owan, God nofalipai ma pegape wahifipa hilili'. Na'amba ipa' ukup pendanda' pi'i, apa' ea' mape hilili' wahifipa, dei' andeande'ma monda' waf alop atopafi. Ukup pendanda' na'amba owa'. Ipa' ukup pindapindaila sahin owan ipe'isi penda' maol naninani pendatopalopa atin.^p ¹⁴Dei' main, mu'uli God nagaso' Mosesani hiani nape nomona basef ifimba atif fa'i, "Ipa' ukup pipila epes isimba hiasi hi'indaldas si'i ukup pagaila ipa' atipa."

¹⁵Apa' i'i ipa' migimigah penda' lopa' fitap nepe la'afena ipa' atipa, ipa' solawaipa andeande'. Na'amba ipa' hipai pendakolef pesa pewala atin hi'ilipa!^q

Waf dambaifi ma Ambal bu'unai Godi faloma wafa opalef apimi

¹⁶Basef ae' aga'iefi ifimba. Ipa' pihapifa Ambal bu'unai Godi pendafe'. I'i ipa' pilas penda'as na'amba, ina atiasi pila waf nembel apinai,

J 5:5 1 Ko 7:19; Ga 6:15 k 5:6 Ga 1:6 l 5:8 1 Ko 5:6 m 5:9 Ga 1:7; 2 Ko 11:15
n 5:10 1 Ko 1:23 o 5:12 1 Pi 2:16 p 5:13 Mt 5:43; Ro 13:9 q 5:15 Ro 8:4; Ga 5:25

owa'atin.^r ¹⁷Apa' mogawa, waf nembel apinai na'i nili'amonu Ambal bu'unai Godi, ea' Ambal Godi na'i nili'amonu opaf apinai. Amom biam mondopambema mafitap mape. Ea' hiahawes ipa' pa'i pinda'asi ina banagepama penda'as, owa'.^s ¹⁸Ipa' i'i pigaila Ambal bu'unai Godi atona ipa' ina ata' pape lafela mu'uli esis Juda sagailani, owa'.^t

¹⁹Waf opaf apinai epes hiasi sogawaf ea' fape alihif. Afamba na'amba. So'a waol, waf alogufi, ukup pegehafema waf awafi, ²⁰sandagala saganifela god baso'amunai, sanda' aupi ufial ma'akwi, waf negefala anis bousi, ukup papoma esis atis, migimigah, waf kowagalasafi, ukup wandafip, basef wandafifi ma sondawal biafis sogawala wambotagw, ²¹ukup awepa waf kowagalasafi, sanda' spak sohaga sogagaol, saga' gwa'aisii embel banagambeli hiasii ma sanda' awalef awalifi, ea' waf naninani aunai na'ambai. Fowa' a'ipipa dei' a'i i'ipipa wapani. Epes mamahisa sanda' waf afambai, anaf ina sefe' suwis anamba God nagala'ambemagoma, owa'atin.^u

²²Apa' Ambal bu'unai Godi nawalapai waf bu'wafi na'amba. Waf ukup pigapigaila anis daias, dagala, opalef awanilifi, waf nepe nititilisa sonda'mena waf awafii, waf sigati uwahipisafi waf ukup be'ebe'epa anis daias negatopalopas, nenda' hiahawes datima ma naep Godi epesi wapani,^v ²³waf sa'umbilifi, faloma waf nomonas sopaisa sugumafi alop andeande'i. Owa' anif basefa mu'uli atitin nepe lu'win negapa'aga waf afamba bu'wafia, owa'atin.^w ²⁴Epes mamahisa Kraisi Jisasi sandola opalef apimi mail lawag usi'igai ti'wanaegai maloma waf fafifafi ukup pigahafemafi faloma waf hiafi kowagalasafi.^x ²⁵Ambal bu'unai Godi atona naso'apa ambal namili lapaepa. Ea' dei' apa' mila waf ananifi mondafe'.^y ²⁶Apa' ina monda' du'waniga mefela agof ape'igufi dowadowaf, mi'i basef moloma alipisi ape'isi mondahihianamaefa anef waf, owa'i. Apa' ina kowolapa ma anis epes daias soloma hiahaom asasimi, owa'i.

Apa' mondotopalopa esis alipisi ma mogofa' nimanimi mogatagamasi

6 ¹Sahin owan, ipa' i'i pigati anin epen ipe'ini nenda' anef waf awafi, ipa' anipa pagape banagepama Ambal bu'unai Godi petopalopan pisindi'amonan sa'osa'ombel. Ipa' hipai atona atin solawaipa ma waf ipe'ifi. Na'amba Satan nogwamba ipa' wapani.^z ²Ipa' petopalopa sahin owan ipe'isi ma pegefa' nimanimi asasimi. Penda' waf afambai fefe' fendahama mu'uli Kraisi endilisi. ³I'i anin epen okom mondanda' nembaso'am ni'i anin agol lu'wagilini, ma anin agol akan, epen inimba

^r 5:16 Ro 7:15-23; 1 Pi 2:11 ^s 5:17 Ro 6:14, 8:14 ^t 5:18 1 Ko 6:9-10 ^u 5:21 Ef 5:9

^v 5:22 1 Ti 1:9 ^w 5:23 Ro 6:6; Kl 3:5; 1 Pi 2:11 ^x 5:24 Ro 8:4 ^y 5:25 Fl 2:3 ^z 6:1 Ro 15:1; Mt 18:15; Je 5:19

nandambaso'ma nembel ananimbili atembel.^a ⁴Epes hiasi atona atin ata' sihihi' maol asasini daindai, bo'wen a'a owa'. I'i bo'wena, epen inimba sonehana maol inimba ananini. Ea' anin maol akana negawaloga maol anin daiani.^b ⁵Amam nematawa hiasi atona atin anaf sofa' nimanimi asasimi daindai.^c ⁶Epes mamahisa sogolafa basef Godii, esis ukup pendanda' sowaloga hiahawes fasisi asasisi soso'ana du'wanis sondafe'ma epen gawaini nagawalipasi.^d ⁷Ipa' ina pembaso'ma nelelemb ipe'ilimbi pi'i God okom magahanai gawa akanai, owa'i. I'i anin epen newa anis maefah aof ananifi, anaf hiahawes isimba atis nitanima nela'as wapani. ⁸I'i epen inimba nenda' maol neloma wafa opaf apinai ananinai, bola waf anamba atona nonda' epen inimba awen nega' higililan. Apa' epen mamahina nenda' maol negaloma waf Ambal bu'unai Godi, atiasi Ambal anamba nowalapai ambal namili ma epen inimba nepe andeande' lifilafi.^e ⁹Isimba atis dei' apa' ina ala'uta tahapa ma monda' waf fasifi, owa'atin. Monda'as dindinip. I'i bihitagof ape'igufi fonda' maol banagambel, anaf mola'as mofa' gwa'aisi bu'wasi endilisi. ¹⁰I'i apa' muti ufa'w fasi'uma, monda' waf fasifi ma epes hiasi mondatopalopas. Apa' mondanda'am na'amba atin banagambel esis sahin owan sogahapifa Dembinaii mikila' manda'asa anis daias.

Pol nandagalama lawag usi'igai ti'wanaegai Jisas Kraisi

¹¹Ipa' piti amef ifimba lu'wafi dei' ahapila pen lagol ae'agili anda'mepafi.^f ¹²Anom amam dindinapim a'owa' ma ma'i mogatopa'mepa alop ipe'ipi. Dei' maina amom manda'as na'amba? Ma'i mogofa' agof lu'wagufi ma naep epesi.

Amom ukup pandanda' na'amba ma'i, "Na'amba anis epes sogawa afa' si'i afa' waghapifa lawag Kraisi ea' sohafa oga'."

¹³Ina anis epes saila mu'uli inimba God nagaso' Mosesani andeande' datima, owa'. Amom magatopa' alop amamipii wapani, ina mailan andeande', owa'. Ma'i motopa' alop ipe'ipi ma mogofa' agof lu'wagufi ma mi'ipa epes hiasi moga'i, "Amom Galesia mofa' ametal inimba mogatopa' alop amamipi."^g

¹⁴Apa' ae' owa'atin. Andaiwa' ma egefela agol ae'agili lu'wagola anis hiahawes daias, owa'atin. Ae' andagala ma egefela agola dembinai ape'inai Jisas Kraisi atona, anen naga' lawag usi'igai ti'wanaegai. Lawag agamba Kraisi atoga, dei' waf itapafi ea' faga' nomon okom ae'ami, dei' ae' si'i epen nagaga' lawag usi'igai ti'wanaegai ma naep epes sagape itapi.^h ¹⁵Waf afamba magatopa' alop o owa' mogatopa' alopia, afamba falafifi atef. Apa' God nanda'apa mataga dambaipai, waf afambai atef

a 6:3 1 Ko 11:28 **b** 6:4 Ro 14:12 **c** 6:5 1 Ko 9:11,14 **d** 6:6 Jo 3:6, 6:63; Ro 8:13
e 6:8 1 Te 3:13 **f** 6:11 Ga 5:11; Fl 3:18 **g** 6:13 1 Ko 1:31, 2:2 **h** 6:14 Ga 5:6; 2 Ko 5:17

dao' endilisifi. ¹⁶Epes mamahisa sogahapila ukup ipimbai sogailapi, ae' a'i opalef asasilifi fendape sa'ombela, God niti uwahipis notopalopas sogoloma epes Israel hiasi Godi.ⁱ

¹⁷Basef akutaifi ifimba. Ae' andaiwa' ma anona aman nogase'e anom nimanimi wapani, owa'. Dei' main, amam amamba magahai melet atamba Jisasi tape alop ae'api ea'.

¹⁸Ipa' alipipai, ae' a'i dembinai ape'inai Jisas Krai notopalopepa dowafa pegape andeande!. Dei' okom ananimi mope mondalomago ambagof ipe'igufi. Endilisi.